

東

華

錄

東華錄

順治六

臣王先謙敬編

臣周淪蕃恭校

順治三年丙戌春正月乙酉朔朝鮮來貢○辛酉定西大將軍何洛會等奏逆寇賀珍孫守法胡向化率馬步兵七萬餘犯西安會固山額真墨爾根侍衛李國翰等兵至內外夾擊殲滅殆盡獲駝馬甚眾下部察敘○固山額真公阿山聽巫者薩海言雅巴海之妻與人私因語雅巴海令出之雅巴海不從阿山乃同其子長史塞赫偪雅巴海移居而離其妻幽之於家雅巴海妻奔逸訴於刑部具讞啟攝政王王令議政王等復鞫擬阿山違法用巫勒令雅巴海出妻又希脫巫者罪巧飾具奏罷職解任塞赫父過不諫罷職鞭一百俱籍沒家產內大臣國戚多爾濟梅勒章京譚布用譚

泰所薦巫治病不白於部均應罷職罰銀一百兩內大臣宗室錫翰及公塔瞻護軍統領公圖賴知而故遣巫者與人治病雖經自首亦各罰銀巫者薩海論斬雅巴海夫妻於本王下所管牛彙聽其自附獄成復啟攝政王王以阿山多軍功止罷職解任塞赫亦止罷職贖身俱免籍家產國戚多爾濟譚布各罰銀巫者薩海鞭一百不許行巫雅巴海並其近族兄弟隨便自附牛彙錫翰塔瞻圖賴俱免罪固山額真譚泰亦坐與其婦翁阿山擅遣巫者與人治病遂並究其前罪先是譚泰爲娛其妻乞公主花園於圖賴又於分道出師取西安時遣索爾和碩爾對謂圖賴曰我軍以道路迂險是以後至南京可讓我軍取之圖賴以告和碩德豫親王及諸將遂作書付希思翰牛彙下塞爾特使齎送索尼轉啟攝政王希思翰閱書見有礙譚泰令投於河滅迹後圖賴詢及前書塞爾

特詭言於黃河遺失因繫塞爾特於城門索之旣而聽監守驍騎校馬爾翰言復誑稱前書已付索尼索尼屬我箝口故妄言如彼耳事聞攝政王下諸大臣覆勘諸大臣因擬索尼應斬啟入攝政王復親鞠之索尼對曰向者譚泰將奉旨印文自專不以示眾吾謂譚泰忘君背旨尙發其事今豈庇譚泰而匿此書乎攝政王曰索尼發譚泰擅隱諭旨之事在先此書在後似持書人別有情弊因復訊之塞爾特乃盡吐其情且云譚泰使伊啟心郎覺和托屬我箝口也於是擬譚泰及希思翰竝其二子俱論斬籍其家索爾和碩爾對以悖理事妄聽差遣亦論斬馬爾翰鞭五十覺和托鞭一百監守塞爾特之牛彖章京吳班縱覺和托得行私屬罷職啟攝政王王令下譚泰於獄給以家口男婦九十餘人及器皿衣服餘產入官索爾和碩爾對免死折贖希思翰正法免其二子死

及籍沒家產塞爾特以無罪寬釋餘俱如議獄既定侍衛阿里馬私語圖賴云爾何爲庇護索尼耶吾見其心已變舉動已改常矣圖賴聞於攝政王王令捕阿里馬及其二弟索尼岱鎖甯時阿里馬索泥岱拔刀相拒俱正法鎖甯無罪釋之○攝政王於午門譚譚泰罪時護軍統領公圖賴厲聲謂攝政王曰爾何將譚泰之罪耽延三日不結攝政王怒謂圖賴曰爾舉動亦太妄矣曩追流賊至慶都分兵前進因諸將爭先爾曾誚讓於肅親王豫親王英郡王且唾於諸王之前今又以言偪我我不能堪似此怒色疾聲將逞威於誰耶予與諸王非先帝子弟乎語畢還府嗣聞諸王執圖賴議罪返而言曰圖賴雖聲色過厲然非退有後言可比且爲我效勤矢忠無他咎也解其縛釋之○江西提督總兵官金聲桓奏副將劉一鵬等圍僞永甯王於撫州紅旗王定國先登官兵繼

進逆眾潰走南門我兵四面環截擒偽永甯王朱慈炎竝其子邦
眞如張氏及其僞總兵謝尙達等九十餘員斬獲無算餘黨奔據
建昌我兵追擊復棄城而遁下所司察敘○壬戌定宗室壻品級

○癸亥定歲祭陵廟禮○乙丑以吳世俊楊名高俱爲左副都

御史

俱由理
事官遷

○戊辰以宋權爲內翰林國史院大學士

由順天
巡撫遷

○

己巳命肅親王豪格爲靖遠大將軍同衍禧郡王羅洛宏貝勒尼
堪貝子屯齊喀滿達海鎮國公喀爾楚渾岳樂努寨等帥師征四
川○招撫江南大學士洪承疇奏故明唐王朱聿劍兵寇徽州總
兵張天祿等率兵堵剿敗之獲其閹部黃道周等諭降不從斬道
周等於軍前我兵追及逸賊直入浙江開化縣士民薙髮投順下
部察敘○庚午開湖廣鼓鑄○以英郡王阿濟格張蓋坐午門坐
以應得之罪○辛未定故明宗室卹典親王給銀二百兩守墓八

人祭田九十畝郡王給銀一百兩守墓四人祭田六十畝親王已封之子及妻給銀一百兩郡王已封之子給銀五十兩將軍給銀五十兩諸王之祖母及母各視所封給銀令自行祭葬○甲戌禮部奏今年二月會試天下舉人其中式名額及內簾房考官均宜增廣其數以收人才得旨開科之始人文宜廣中式額數准廣至四百名房考官二十員後不爲例○以故明禮部尙書錢謙益仍以原官管秘書院學士事禮部尙書王鐸仍以原官管宏文院學士事編修劉正宗爲國史院編修庶吉士魏天賞爲國史院庶吉士○丁丑定給俸制

二月辛巳駐防江甯侍郎巴山梅勒章京康喀賴等奏正月十二日夜江甯府城內民與城外賊同謀作亂事覺捕斬爲首者三十人至十八日夜賊首僞潞安王瑞昌王復率賊兵二萬餘三路入

犯俱擊敗之○會試天下舉人命大學士范文程剛林馮銓甯完

我爲會試總裁官○甲申以譚拜爲兵部尙書明安達禮爲兵部

侍郎

由梅勒章京遷

○罷江南省舊設部院以軍務方殷差在京戶工兵

三部滿漢侍郎各一人駐江甯分理○乙酉攝政王多爾袞傳集

戶部尙書公英俄爾岱大學士范文程剛林甯完我學士額色黑

等謂之曰予恭逢 太祖 太宗遺業代 上攝政惟恐事多闕

誤生民失所念民爲邦本日夜焦思又素嬰風疾勞瘁弗勝予躬

凡有過失爾等勿得瞻徇當各抒所見眾皆對曰自古人君自憂

不能治者國必理視爲不足治者國必敗惟其鰓鰓過慮正乃所

以爲治也夫國君爲政不恃躬親庶務要在任用得人今王總攬

大綱亦惟任賢舉能乃克底績王曰所言是也今國家一應事務

各有專屬戶部惟英俄爾岱內院惟范文程剛林甯完我額色黑

等是賴爾等勉力辦理勿憚勞苦又顧謂范文程曰爾素有疾毋過勞早出署休沐善爲調攝范文程頓首謝曰一介微軀何敢當王溫慰王又顧謂甯完我曰爾向來常請陳奏今胡默然爾等內院官員於國家事務當不時條奏爲是范文程剛林等對曰文程等朝夕在王左右凡有聞見無不面啟候取進止無庸具本敷陳王然之○定西大將軍內大臣何洛會等奏固山額真墨爾根侍衛李國翰昂邦章京齊墨克圖領兵護送奏疏遣副將王平率兵百名前行至渭南縣界遇王姓秀才賊兵千餘人擊敗之又遣中軍陳德副將任珍等以兵七百破賊首劉文炳於蒲城縣擒賊將王交張留斬刈殆盡俘獲甚多遂趨同州敗賊首李遙殲賊二百餘名臣等聞賊渠賀珍由黑水峪口奔武功縣遂統領官兵追至濠泗河大敗之斬獲甚眾○梅勒章京屯泰奏僞永勝伯鄭彩遣

偽總兵劉福副將林引等領眾援江西撫州副將王得仁等敗之
斬賊千五百餘級又敗其偽副將趙珩等於高山嶺斬獲無算○

戊子以柳寅東爲右僉都御史巡撫順天

由太僕寺少卿遷

○諭定遠大

將軍肅親王豪格曰據南陽總兵官任得功奏河南南陽府逆賊
一隻虎郝如海等糾集騎兵七千步兵二萬肆行搶掠大爲民患
等語朕思見今陝西西安等處稍甯無有他警王其選精兵二千
名簡領將帥前赴南陽詢問任得功賊巢所在前往撲剿如賊已
遠遁追之不及遣人來奏王仍往西安遵前旨行王等所領餘兵
著在西安府秣馬以俟○庚寅吏部左侍郎陳名夏再奏請終父
制命暫假歸葬特賜銀五百兩仍許支俸贍養在京家屬○乙未
郎陽撫治潘士良以才力不及免○丙申遣侍郎巴山梅勒章京
張大猷率師鎮守江甯甲喇章京傅喀蟾梅勒章京李思忠率師

鎮守西安○諭定西大將軍何洛會曰茲遣順德潞安平陽蒲州
四處滿洲弁兵家口前往西安駐防俟到齊之日爾何洛會明白
交代來京前會有旨命和碩肅親王撥滿洲蒙古兵一千名隨爾
鎮守西安今爾來京可將所撥滿洲兵帶回其蒙古兵遣歸本部
落遣蒙古兵時爾可撥同回將領及士馬送出邊境仍須沿途嚴
加約束毋得搶掠民間財物○招撫江南大學士洪承疇奏潛山
太湖間司空寨賊首石應璉等擁故明樊山王朱常㮮嘯聚焚擄
遣將士馳勦斬應璉等五人生擒常㮮各寨悉平得旨朱常㮮著
正法○浙閩總督張存仁奏昌化縣賊首姚志卓嘯聚亡命與江
東叛寇方國安相結攻陷縣城協鎮張杰等領官兵進勦志卓遁
去昌邑復平○癸卯朝鮮來貢○乙巳開延綏鎮鼓鑄○丙午命
貝勒博洛爲征南大將軍同固山額眞公圖賴率師征福建浙江

三月辛亥翻譯明洪武寶訓成 上以寶訓一書深裨治理 御

製序文頒行中外○乙卯詔近京居民田宅圈給旗人別行撥補者免稅糧一年○定西大將軍何洛會等奏擒斬黑水峪賊首孫守法胡向宸等及其從賊二千餘人陣獲虜馬無算○歸化城昂邦章京古祿格等來貢○丁巳陝西總督孟喬芳奏定西大將軍何洛會追賊僞光山伯劉體仁於山陽縣敗之斬首二萬級○己未以王來用爲戶部右侍郎總督山西四川等處糧餉馬鳴珮總督江南諸省糧儲○壬戌殿試天下貢士李昉棠等制策曰帝王君臨天下莫不欲國祚長久傳之無窮乃三統代興五行遞王初皆顯奕後漸式微豈天之降命然歟抑人事所致也朕承 上帝之寵靈祖宗之休烈入主中夏奄有多方而海澨山陬尙阻聲教今欲早成混一衽席生民鞏固鴻圖克垂永久以億萬年敬 天

之休違何道而可歟內外臣工朕所與共理天下者也朕居深宮之內邪正真僞不能悉辨是非公罪不能盡明全憑章奏以爲進退賞罰每聞前代朝臣分門別戶植黨營私蒙蔽把持招權納賄朋類則頓生羽翼異己則立墜深淵更有同年同資師生親故互相援助排擠孤蹤浮議亂真冤誣莫控朝綱大壞國祚遂傾深可鑒戒今恐在朝各官因仍敝習不能力改前非所關治亂甚非細故必如何而後可盡革其弊俾朕得日聞正言行正事以綜覈名實修明法紀歟在外各官貪酷不公者甚眾臨民聽訟惟賄是圖善惡不分曲直顛倒吏治既壞民心日離奸狡計行善良被陷斯亦向來有司之痼疾也必如何而後能使官方清肅風俗還淳以致太平歟欲定天下之大業必一天下之人心吏謹而民樸滿洲之治也今如何爲政而後能使滿漢官民同心合志歟語曰有治

人無治法又曰帝王勞於求賢而逸於得人夫以四海之廣人民之眾應有奇偉非常才全德備之大賢能佐朕平治天下以延運祚於無疆者必如何而後可致之歟諸士心悼前車身逢鼎運得失之源治亂之故籌之熟矣其悉心以對毋畏毋隱明著於篇朕將親覽焉○甲子吏部右侍郎金之俊等奏故明舊例進士四百名二甲選部屬知州三甲選評博中行推官知縣不論名次每逢內外兼用政體人情均屬未協今開勅之初法宜變通臣等擬二甲前五十名選部屬後二十名選評博中行三甲前十名選評博中行十一名至二十名選知州二十一名至七十名選推官餘盡選知縣庶政體人情俱得其平從之○乙丑以王點爲山西左布政使林德馨爲山西按察使管右布政使事○庚午平南大將軍貝勒勒克德渾奏臣等去年十二月十八日自江甯乘舟向湖廣

省進發正月初十抵武昌偵知馬姓王姓總兵自岳州叛奔何騰蛟於長沙遣護軍統領博爾惠等率兵馳擊遇叛賊千餘掠臨湘盡殲之進至岳州王總兵聞風遁走追擊敗之馬總兵豫從水路遁去副將黑運昌未往率船二百艘迎降二十九日師至石首聞賊渡江圍荊州賊船千餘艘泊江上臣等於二月初二日遣尙書覺羅郎球等赴江南岸諭令賊儻渡江卽行督剿奪其船艘大軍遂去荊州百里渡江乘夜疾馳初三日早抵荊州賊竟不覺尙爾攻城我兵突分兩翼直躡賊營大破之斬獲甚眾薄暮收兵郎球等於江南岸獲賊船千餘艘次日遣奉國將軍巴布太等分爲兩路追殺賊眾於安遠南漳喜峯山關王嶺襄陽府等處撲斬殘寇殆盡師進彝陵口李自成弟李孜同僞磁侯田見秀僞義侯張耐僞武陽伯李佑僞太平伯吳汝義及僞將三十九人馬步賊兵五

千餘名詣軍降獲玉璽一人口無算馬廐牛隻一萬二千餘惟一
隻虎未獲捷聞優獎之下所司察敘○乙丑賜傳以漸等進士及
第出身有差○己巳昌平民王科等盜發明帝陵伏誅○壬申喀
爾喀部額爾德尼哈談巴圖魯等來貢○多羅饒餘郡王阿巴泰
薨年五十八 太祖武皇帝第七子也○癸酉故明大學士張四
知自江南來降○封烏朱穆秦部塞冷蒿齊部薄羅特爲貝勒阿
霸垓部多爾濟爲貝子以 太宗皇帝平察哈爾時舉部來降也
夏四月丁丑朔諭征山東山西陝西河南及武昌慶都山海關九
江功將士升授有差贈死事者官子弟襲職○分隸投誠官於八
旗○己卯諭平南大將軍勒德克渾曰頃聞爾等破滅一隻虎等
賊深用嘉悅是皆爾與諸將士同心勦力爲國盡瘁故不至重勞
我師削平逆醜今一隻虎等賊旣殄滅乘暑氣未甚亟宜班師至

於故明廢藩宗姓有獻地投誠者俱著免死攜來京師或窮迫降順或叛而復歸及被執獻者無少長盡滅之其英王已招降之賊黨一經釋放復聚爲亂肆行擾民甚爲失計如聞賊李自成之弟李孜及賊官田見秀張耐李友吳汝義及副將參將等官並賊之兵丁窮而來歸降叛反覆者俱斬儻有誠心迎降者著免死攜來凡歸順良民勿得擾害○諭兵部恭順王孔有德懷順王耿仲明智順王尚可喜續順公沈志祥著各統所部兵馬於五月初一日先赴京師步兵著委官率領亦於是日起程隨後至京○給事中向玉軒以新進士厯事尙淺不便特授科道請將部屬改授得旨向玉軒所奏附會莊憲祖結黨把持俱革職遞送刑部嚴究同黨姓名○鄖襄總兵官王光恩奏攻破房縣賊寨並白馬洞一隻虎餘賊生擒叛將王斌斬首三百六十餘級陣獲牛馬銀印又報一

隻虎黨僞光山伯劉體純詐降後焚劫樊城攻犯襄陽偕巡撫徐起元擊敗之○甯夏總兵官劉芳名奏甯夏兵變殺巡撫焦安民隨經撫定擒斬首逆楊成名白友大等○甲申免浙江錢塘仁人間架稅○乙酉大學士剛林等奏請於本年八月再行鄉試來年二月再行會試以收人才其未歸地方生員舉人來投誠者亦許一體應試從之○戶部議准招撫江西兵部尙書孫之獬奏故明宗室團聚江西省城近數千人欲恩全之應令散居各省宗祿照故明初徵額數解部其加派庶祿概行蠲免得旨各省前朝宗祿田錢糧與民田一體起科造冊報部其宗室名色概行革除犯法者與小民一體治罪仍令各安故土不必散處○丁亥免河南祥符等四州縣被水額賦○戊子攝政王多爾袞諭戶部尙書公英俄爾岱刑部尙書宗室吳達海大學士剛林祁允格甯完我等曰

予恭攝大政賞罰類若疇弗予恭繫茲天潢諸王昆弟咸太祖

太宗二聖之子弟也際斯崇貴正宜優養安榮坐立拜跪之文殊爲可省日者出師予爲祖道以金鞍良馬解贈和碩肅親王王屈體而受予用是心惻至今念之因欲禁遏此禮脫與諸王覲語彼必遜謝爾等爲我善諭之○刑部奏凡重辟減等者鞭一百得旨耳鼻之在人身最爲顯著貫穿耳鼻之刑永行革除○辛卯御史蘇京奏投充名色不一率皆無賴游手之人身一入旗奪人之田攘人之稼其被攘奪者憤不甘心亦投旗下爭訟無已刁風滋甚祈敕部嚴禁濫投事下戶部○刑部議覆犯官莊憲祖聽信刑部主事程滂私屬謀之左僉都御史趙開心上疏瀆奏向玉軒聽信工部主事王三元私屬再疏條陳擬莊憲祖向玉軒程滂王三元革職賁懲趙開心革職得旨莊憲祖等免賁俱革職爲民○癸

已除明季加徵太平府姑溪橋米稅金柱山商稅安慶府鹽稅○
乙未免直隸靜海興濟縣荒地賦○丙申江西巡撫李翔鳳奏浮
梁餘干等縣逆寇句連閩賊倡亂直犯饒城副將鄧雲龍等擊敗
之副將王得仁等進兵水口擊敗閩賊克光澤縣復旋師撫州剿
殺東鄉安仁一帶逆孽俘斬甚眾○戊戌攝政王多爾袞諭內院
嗣後諸王大臣差遣在外凡有啟奏具本 御前予處啟本著永
行停止○己亥罷織造太監○以張尙爲甯夏巡撫○辛丑諭吏
部朝廷設官治民允員反致病民各府設推官一員其挂銜別駐
推官盡行裁革大縣設知縣縣丞典史各一員小縣設知縣典史
各一員一切主簿盡行裁革原管職事大縣歸併縣丞小縣歸併
典史其裁缺推官主簿赴部改選至各府同知通判各贅員可裁
者通察具奏○壬寅諭戶部運屬鼎新法當革故前朝宗姓已比

齊民舊曰鄉紳豈容冒濫聞直隸及各省地方在籍文武未經本朝錄用者仍以向來品級名色擅用新頒帽頂束帶交結官府武斷鄉曲冒免徭賦累害小民甚至貲郎粟監動以見朝赴監爲名妄言復用藐玩有司不當差役且有閩廣蜀滇等處地方見任僞官阻兵抗順而父子兄弟仍依恃紳衿肆行無忌種種不法蠹國殃民深爲可恨自今諭示之後將前代鄉宦監生名色盡行革去一應地丁錢糧雜汎差役與民一體均當蒙混冒免者治以重罪該管官徇私故縱者定行連坐其僞官父子兄弟家產人口通著該地方官詳確查奏不許隱漏○諭戶部國計民生首重財賦明季私徵濫派民不聊生朕救民水火蠲者蠲革者革庶幾輕徭薄賦與民休息而兵火之餘多借口方策無存增減任意此皆貪官猾胥惡害去籍將朝廷德意何時下究明季叢蠹何時清釐今特

道大學士馮銓前往戶部與公英俄爾岱徹底察覈在京各衙門錢糧款項數目原額若干見今作何收支銷算在外各直省錢糧明季加派三項蠲免若干見在田土民間實種若干應實徵起解存留若干在內責成各該管衙門在外責成撫按嚴覈詳稽擬定賦役全書進朕親覽頒行天下務期積弊一清民生永賴稱朕加惠元元至意○甲辰修盛京孔子廟○乙巳戶部請定制錢七十文作銀一錢不許多增通行嚴禁從之

五月丁未以蘇尼特部騰機思騰機特吳班代多爾濟思喀布蟒悟思額爾密克石達等各率所部叛奔喀爾喀部碩雷命德豫親王多鐸爲揚威大將軍承澤郡王碩塞等率師會外藩蒙古兵往討蘇尼特並取碩雷○庚戌敕諭朝鮮國王李倬曰朝鮮歸順之後林慶業煽惑離間潛遣奸細私通他國及令領舟師故意推諉

致誤軍機推問之時尙不輸服卸責於王徑行脫逃後與叛逆結黨謀害本王自知事洩竄投明朝罪惡多端朕不發慶業回國原非姑息因平定中原施恩大赦一應罪惡概行解網今王欲得慶業以靖亂萌理所宜然卽將慶業發與謝恩陪臣解回○諭兵部隱匿滿洲家人向來定擬重罪朕心不忍減爲鞭笞豈料愚民不體軫恤之心反多隱匿之弊在在容留不行舉首止此數月之間逃人已幾數萬斯皆該地方官員不加嚴察之咎也似此逃竄不已玩法殊甚其如何更定新律嚴爲飭行俾愚民免罹國法爾部詳議具奏尋議隱匿滿洲逃人不行舉首或被旁人訐告或察獲或地方官察出卽將隱匿之人及鄰右九家甲長鄉約人等提送刑部勘問的確將逃人鞭一百歸還原主隱匿犯人從重治罪其家貲無多者斷給事主家貲豐厚者或全給半給請旨定奪處分

首告之人將本犯家貲三分之一給賞不出百兩之外其鄰右九家甲長鄉約各鞭一百流徙邊遠如不係該地方官察首者其本犯居住某府某州縣卽坐府州縣官以怠忽稽察之罪降級調用若本犯所居州縣其知府以上各官不將逃人察解照逃人數多寡治罪如隱匿之人自行出首罪止逃人餘俱無罪如鄰右甲長鄉約舉首亦將隱匿家貲賞給三分之一撫按及各該地方官於考察之時以其察解多寡分其殿最刊示頒行天下人人通曉毋致犯法從之○戶部奏制錢漸廣舊錢日賤應改革不用惟崇禎錢暫許行使其餘舊錢悉令送部每斤給價八分以資鼓鑄報可○丙辰以佟代爲兵部侍郎徐大貴爲刑部侍郎俱由理事官遷○己未論破流賊及定河南江南功晉三等公圖賴一等公鎮國將軍宗室拜尹圖三等公餘升授有差贈死事者官子弟襲職○庚申攝

政王多爾袞以信符收貯大內每經調遣奏請不便遂貯王府○兵部議覆鎮守江西總兵官金聲桓奏臣原銜提督撫勦今改爲鎮守事權不隆無以彈壓軍民文武請仍給原銜錫之敕書假以便宜臣部查鎮臣無節制文武之例本朝更無便宜行事之制聲桓所請殊爲僭越自難允行但江西寇氛尙熾姑改鎮守爲提督一切勦撫事宜仍令會同撫按並聽內院大學士洪承疇裁行命改金聲桓爲提督總兵官仍飭行○辛酉吐魯番國來貢○壬戌京師紛傳故明諸王私匿印信謀爲不軌卽行查果獲魯王荆王衡王世子金銀王印魯王等十一人伏誅因集九卿科道大小各官諭曰本朝舉兵征伐原非無故因萬厯年間數窘辱我國以致憤興師旅今荷天休得膺大寶不修舊怨禮葬崇禎追加謚號其陣獲諸王盡加收養乃不知感恩圖報反妄欲推立魯王等私

匿印信將謀不軌朕不得已付之於法其未與謀者仍與恩養因
諭爾等知之吏部侍郎金之俊等奏曰若等背負寬仁謀爲不軌
實法所宜誅又諭曰朕每欲撫恤殘疆拯救子遺勵精圖治似此
譌言不息實煩朕意耳○癸亥以梅勒章京葉克書爲昂邦章京
鎮守盛京○甲子以張鳳翔爲戶部右侍郎故明兵部左侍郎○丁卯以
金柱爲浙江右布政使由直隸昌平道僉事遷○庚午以陳有明爲工部侍
郎督理蘇杭織造由啟心郎遷○辛未免江南沛蕭二縣元年二年荒
地額賦之半○壬申定鹵簿儀仗及諸王貝勒貝子公等儀仗引
導之制

六月戊寅革湖廣布政使李嵩職以赴任規避違限也○壬午敕
諭吐魯番國蘇魯譚阿布倫木漢默德阿濟汗曰爾遣都督馬薩
郎虎伯峯進上賀表貢獻方物誠可嘉悅朕荷 皇天眷佑奄有

寶宇期於四海甯謐遐域嚮風長享太平與山河永久念爾吐魯番原係元朝成吉思次子察哈台受封此地故明立國隔絕二百八十餘載今幸而復合豈非天乎爾等誠能恪修貢獻時來朝賀大貢小貢悉如舊例則恩禮相加豈有忽忘之理今遣馬薩郎虎伯峯並都督職事阿巴火者等回國特賜綵段表裏爾國所授有明敕印可遣使送繳以便裁酌授爾封爵○贈死事陝西延安府同知張有芳等九人官○丙戌給事中林起龍奏近日風俗大壞異端蜂起有白蓮大成混元無爲等教種種名色以燒香禮懺煽惑人心因而或起異謀或從盜賊此真奸民之尤乞速敕都察院五城御史巡捕衙門及在外撫按等官如遇各色教門卽行嚴捕處以重罪以爲杜漸防微之計從之○丁亥諭兵部聞青州大同尙有故明親王郡王在彼寄居恐被流言誣告致取罪戾爾部可

令各該督撫卽爲查明並其眷屬委撥官兵護送來京勿致途次

疏虞違者重治他省地方如有廢藩寄居者俱令查明奏聞○己

丑湖北總督羅繡錦奏總兵官徐勇率兵攻破麻城各山賊寨生

擒僞副將梅增僞總兵周文江岳州署總兵官馬蛟龍等陣斬僞

帥滿大壯生擒僞將龍見明等下部議敘○給事中袁懋功請敕

儒臣取歷代禮制斟酌損益編成一書頒行天下疏下禮部○以

李棲鳳爲湖廣右布政使

由上荆南道參政遷

○壬辰左副都御史劉漢儒

以病免○以高士俊爲左副都御史巡撫湖廣

由下荆南道參政遷

○乙未

浙閩總督張存仁奏副將張國勳等進剿太湖逆賊擒獲僞大學

士馬士英長興伯吳日生主事倪曼青等令斬士英等有功將士

所司察議○丁酉征南大將軍貝勒博洛等奏大軍五月二十日

抵杭州適賊兵營於錢塘江東岸綿亘二百里艤舟江上以待我

軍未具舟楫不能渡忽見江沙暴漲水淺可涉遂令固山額真圖
賴等策馬徑渡分兵往擊之僞國公方國安望風膽落盡棄戰艦
急趨紹興攜僞魯王朱彝垓遁保台州大兵奮力追勦屢獲全勝
擒僞總兵武景科等斬獲甚眾江東底定○西安民焦裕焦文茂
受賊僞札自稱副將傳書煽亂被獲伏誅○己亥索倫部使鹿部
喇巴奇等來貢○辛丑以周文葉爲陝西左布政使由山東東充道副使遷
○甲辰秘書院學士錢謙益乞回籍養病許之仍賜馳驛

東華錄

順治七

臣王先謙敬編

臣周濟蕃恭校

秋七月丙午定湖廣官兵經制○以佟國允爲工部侍郎

由理事官遷

○丁未增設御史十五員○己酉以夏玉爲左副都御史

由甲喇章京遷

○甲寅平南大將軍貝勒勒克德渾凱旋○乙卯招撫江南大學

士洪承疇奏請回京以江南尙未大定不允仍賜其妻銀百兩貂

皮二百張○調周文集爲河南左布政使轉劉宏遇爲陝西左布

政使

由右布政使轉

○丁巳揚威大將軍德豫親王多鐸等奏師至營囑

爾察克山聞騰機思等屯袞囑魯台隨令蒙古固山額真庫魯額

達爾漢阿賴等率兵先出繞其後扼據險隘太軍繼進騰機思等

聞風遁去卽令外藩蒙古巴圖魯郡王滿朱習禮同梅勒章京明

安達禮等乘夜進追次日及之於歐特克山賊迎戰大破之斬其
台吉毛害並迎下嫁騰機思格格還我兵渡土喇河復遣鎮國將
軍瓦克達等率兵追之陣斬騰機特子多爾濟巴圖舍津騰機思
孫噶爾馬特木德克博音圖斬首無算盡獲其家口輜重次晨我
軍至博兒哈都山遣貝子博和託等率兵與瓦克達等合軍進剿
斬首千餘級生擒八百餘獲藥駝一千四百五十隻馬一萬九千
三百餘匹牛一萬六千九百餘頭羊十三萬五千三百餘隻○己
未以胡之桀爲陝西布政使司參議管右布政使事由署山東按察使僉事遷
○辛酉吏部奏朝覲考察之期既定於次年正月舉行其應行事
宜首重五花冊臣部卽照舊式頒發各撫按令其攢造齎送朝覲
官員姓名起程日期限十月到部其應朝覲官員俱限十二月到
京違限者參奏不許私自馳驛分外科擾賢否考語一惟撫按定

註考語止用才守政年四格須按人指事明白直書不許鋪敘繁
文有毀譽徇情是非顛倒者議處從之○壬戌江西巡撫李翔鳳
進正一真人張應景符四十幅得旨凡致福之道惟在敬天勤民
安所事此朝廷一用天下必致效尤其置之○乙丑革鑾儀衛緝
訪人役著爲令○以王任重爲山東按察使由武德道副使遷○戊辰甘
肅巡撫黃圖安奏請終養下吏部議以西陲多事圖安借端規卸
革職永不敘用從之

八月丙子衍禧郡王羅洛宏隨征四川薨於軍時年二十四○丁
丑以喇瑪爲工部侍郎步濟達喇爲理藩院侍郎○定河南江西
官兵經制○辛巳邳州土寇楊秉孝王君實等哨聚黨羽僭號設
官謀攻邳城掠民肆害總督王文奎淮徐道參議張兆熊調兵擒
斬之○乙酉揚威大將軍德豫親王多鐸等奏我師自土勒河西

行於七月十三日至查濟布喇克喀爾喀部落土謝圖汗兩子率兵二萬橫列查濟布喇克上游我師嚴陣而前敵來迎戰我師擊敗之追逐三十餘里斬殺甚眾獲橐駝二百七十餘隻馬千一百餘匹次日喀爾喀部碩雷汗之四子本霸巴圖魯台吉等率兵三萬遮查濟布喇克道口而來我師列陣奮擊敗之追逐二十餘里復斬殺甚眾獲橐駝二百餘隻馬七百六十餘匹及問俘卒言碩雷家口部眾悉走塞冷格地方眾議將欲前進因馬疲乏於七月十六日班師下所司察敘○吏部奏逆賊賀珍犯漢中漢羌道胡全才知府楊可經同知董應徵通判李芳激推官原體蒙同心勦力守城著績宜加擢敘請將全才以巡撫升用可經等各加一級用從之又奏原任鄖陽撫治右僉都御史徐起元當闖寇犯鄖苦守三載不肯從逆及英王渡江投誠效力厯著勞績曾經梅勒章

京屯泰具奏奉有俟朝見後加一級用之旨今議加爲右副都御史仍以巡撫推用從之○南贛巡撫苗胙土奏江西各府叛服靡常總以贛州爲觀望之地今諸路官兵十餘營圍贛已四閱月兵將分鑣號令匪一旗鼓不振鎮臣金聲桓柯永盛智勇兼備士馬精良伏乞假以總理之權一赴贛州一鎮南昌令諸營將領悉聽節制庶號令明而蕩平可期下兵部議○丁亥征南大將軍貝勒博洛奏大兵攻克金華衢州二府擒斬僞蜀王朱盛濃樂安王朱誼石及僞伯吳凱總兵項鳴斯等全浙底定下兵部察敘○浙閩總督張存仁奏僞大學士謝三賓閣部宋之普兵部尙書阮大鍼刑部尙書蘇壯等八十四人投誠○戊子以恭順王孔有德爲平南大將軍與懷順王耿仲明續順公沈志祥右翼固山額真金礦左翼梅勒章京屯泰率滿洲蒙古漢軍官兵征湖廣兩廣諭曰爾

等先定湖廣地方次定江西贛南由是入廣東鎮守一方遣人奏報候旨但爾等同爵今在軍中不可不立主帥同去王公諸將等

凡事悉聽恭順王令行○辛卯以于變龍爲山東右布政使由東

遷鄭清爲陝西按察使由湖廣漢陽兵巡道遷○癸巳命智順王尙可喜統

所部兵偕孔有德南討○丁酉揚威大將軍德豫親王多鐸等凱

旋攝政王多爾袞出邊迎之○戊戌達賴喇嘛厄魯特願實汗等

來貢○己亥初大學士范文程祁充格甯完我以甘肅巡撫黃圖

安呈請終養人子至情吏部不宜遽議罷斥擬爲申奏值齋期未

果白於輔政鄭親王濟爾哈朗王令姑待之後攝政王以文程等

擅自闕白輔政王下法司勘問法司議俱削職並籍沒家產以聞

以文程等委任有年姑釋其罪諭令勉效厥職以贖前愆

九月己酉招撫江南大學士洪承疇奏僞瑞昌王朱誼泐結連江

甯常鎮平廣逆黨謀犯省城官兵進剿擒誼功並其黨僞經畧韋爾韜僞總兵楊三貫夏含章等命斬之○壬子定遠大將軍肅親王豪格等奏臣率大軍於三月二十六日抵西安聞寇在邠州遣尙書星訥等分兵往剿賊聞風潰遁追斬千餘級僞副將宋大傑賀洪器參將齊勳張國棟等率馬步三百餘人降又聞慶陽一帶爲賊所據遣固山額真杜雷分兵往剿攻克其寨斬賊渠石二等又遣固山額真巴顏墨爾根侍衛李國翰悉率漢軍兵同副將王平等撲滅延安一帶諸寇五月十六日賊首劉文炳康千總郭天星張破臉等率賊兵三千餘拒敵我師擊之斬殺甚眾獲馬廐百十二匹聞賊渠賀珍在漢中府二隻虎孫守法在興安州武大定高如礪蔣登雷石國璽王可成等在徽州階州大軍於五月初五日自西安起程行分遣貝勒尼堪貝子屯齊喀昂邦章京鰲拜巴

圖魯固山額真覺羅巴哈納等率兵由棧道向漢中興安進發十六日貝勒尼堪等擒賊哨卒訊知賀珍尙圍漢中以馬步賊兵二千據守雞頭關隨遣巴哈納吳賴等分兵一半由山中僻徑以往貝勒尼堪等於十八日抵雞頭關賊兵二千迎拒擊殲之及抵漢中賀珍尙未知覺我兵疾躡其營賊潰而逃追斬無算獲賀珍原領印信並馬廐八百餘匹五月二十五日聞賀珍遁居西鄉縣遣鰲拜馬喇希等分兵往擊追及楚湖敗之獲馬廐三百餘匹聞二隻虎孫守法等破興安貝勒尼堪等自漢中至漢陰二隻虎遁入四川孫守法已奔岳科寨巴顏李國翰等擊敗延安一帶賊兵尾至張果老崖賊入山寨我軍掘濠圍之使人來報因遣守西安府圖賴率滿洲綠旗兵往代巴顏李國翰守張果老崖七月十六日夜潛攻克之擒斬賊渠康干總獲馬廐二百九十三匹臣率兵一

半向秦州進發二十二日分遣貝子滿達海輔國公哈爾楚渾蒙古固山額真準塔巴圖魯等率兵技勦武大定石國璽等率賊兵七百名降高如礪率賊兵迎拒尙書星訥敗之獲馬廐一百四十三匹滿達海等抵三台山圍之臣於六月十二日亦至周視三台山壁立堅固未可以攻令四面掘濠圍之高如礪遁蔣登雷王可臣率賊兵二千降遂克三台山○癸亥賜郭士衡等武進士及第出身有差○甲子免湖北彝陵石首等十三州縣荒地賦十之七荆門江陵等四州縣十之五興國廣濟等十六州縣十之二○丙寅安徽巡撫劉應賓奏僞崇陽王寇歙縣副將張成功等敗之獲總兵閔士英鄭鵬遠等命誅之○丁卯湖川總督羅繡錦奏逆賊何騰蛟等寇岳州鎮將高士清等進勦斬獲甚多下所司察敘冬十月丙子改湖廣承天府爲安陸府○湖川總督羅繡錦奏總

兵官鄭四維等平定彝陵枝江宜都三州縣擒斬賊眾無算下所

司察敍○己卯揚威大將軍德豫親王多鐸等凱旋上出安定

門迎勞之○固山貝子和託薨年二十八○辛巳江南提督金聲

桓奏副將潘永喜等擒僞王朱常海總兵了悟金志遠等斬級無

算鄱寇悉平○甲申革安徽巡撫劉應賓職以大學士洪承疇劾

其濫給副參印札也○江西提督金聲桓奏副將高進庫劉伯祿

等克贛州斬僞閣部楊廷麟下所司議敍○以胡全才爲右僉都

御史巡撫甯夏由陝西漢羌道參政遷章于天爲右僉都御史巡撫江西由山東兗西道參政遷

奏者一概治罪本不許封進○辛卯山東右布政使于變龍坐原

任兗州道時所屬鄒縣失守降二級調用○壬辰革招撫江西尙

書孫之獬職永不敍用以其招撫無功擅加總兵官職銜任意市

恩也○癸巳以徐啟元爲左副都御史

故明郎陽撫治

李棲鳳爲右副都

御史巡撫安徽

由湖廣右布政使遷

○甲午禁官員人等於近京百里內圍

獵貝勒以上欲獵於百里外者必請旨方行違者治罪○乙未兵

部奏指揮千百戶名色旣已盡裁而衛所必不可裁應每衛設立

掌印官一員兼理屯事改爲衛守備千戶改爲衛千總每所設一

員俱由部推百戶改爲衛把總每所設一員由督撫委選其不屬

於衛之所俱給關防衛軍改爲屯丁凡衛所錢糧職掌及漕運造

船事務並都司行都司分轄皆宜照舊從之○論征湖廣功貝勒

勒克德渾公傅勒赫等及從征諸將外藩蒙古賜賚有差○丁酉

上獵於近畿○贈江西巡撫右副都御史李翔鳳爲兵部右侍

郎予祭葬○壬寅 上還宮○太和中和等殿體仁等閣太和等

門工成

十一月癸卯朔征南大將軍貝勒博洛奏既定全浙隨分兵由衢州廣信兩路進師福建固山額真公圖賴等擊敗僞閩部黃鳴駿等於仙霞關遂破浦城前鋒統領努山等擒斬僞巡撫楊廷清李暄分遣署護軍統領杜爾德前鋒參領拜尹岱等攻下建甯延平等府間僞唐王朱聿劍遁走汀州遣護軍統領阿濟格尼堪杜爾德等率兵追襲直抵城下我軍奮擊先登擒斬朱聿劍及僞陽曲王朱盛渡西河王朱盛淦松滋王朱演漢西城王朱通簡並僞官等撫定汀州僞總兵姜正希率兵二萬復襲汀州乘夜登城我兵擊敗之斬殺萬餘級固山額真宗室韓岱等破僞總兵師福軍於分水關入崇安縣俘斬僞巡撫楊文忠等撫定興化漳泉三府署梅勒章京趙布泰等襲克福州前後連破賊兵二十餘陣降其僞總兵二十員副將四十一員參遊七十二員馬步兵六萬八千五

百餘名福建悉平獲僞璽九顆馬輿輜重無算得旨博洛等躬親調度平定浙閩命所司擇吉祭告 天地 宗廟詔赦天下○辛亥保定巡撫郝晉以承旨審鞠叛案游移參差不能執法降二級調用○丁巳朝鮮來貢○戊午浙閩總督張存仁奏錢塘一帶地方緊要應設水師五千以防海寇下所司知之○庚申梅勒章京覺善等奏進剿山東土寇斬首一萬六千有奇俘獲無算○癸亥革山東按察使胡之彬職以巡按御史吳達劾其縱賊脫逃也十二月癸酉朔革山西按察使婁惺伯職仍下撫按鞠問以縱放故明宗姓也○蘇松提督吳勝兆奏故明遂平王朱紹鯤及僞職方楊模等擁眾太湖勾連海寇謀爲不軌副將詹世勳等率兵撲剿擒紹鯤等命斬之○庚辰山東膠州總兵官海時行奏賊首謝遷結連南山諸賊攻陷高苑官兵進剿擒斬僞軍師趙來鄉等諸

纂悉平○壬午命昂邦章京拜山爲議政大臣○山東巡按吳達
奏叛賊小霸王等陷莘縣盤踞日久同知劉自昌參將邢邦勳擊
賊於董王莊大破之復莘縣○甲申靖遠大將軍肅親王豪格等
奏十一月二十六日至南部偵逆賊張獻忠列營西充縣境隨令
護軍統領鰲拜巴圖魯等分領八旗護軍先發臣統大軍星夜兼
程繼進次日黎明抵西充獻忠盡率馬步賊兵拒師鰲拜等奮擊
大破之斬獻忠於陣臣至復分兵四出破賊營一百三十餘處斬
首數萬級獲馬廐一萬二千二百餘匹得旨豪格指授方畧克奏
膚功獻忠伏誅四川平定深可嘉悅有功官兵察明議敘仍擇吉
祭告詔赦天下○乙酉招撫江南大學士洪承疇奏僞高安王朱
常淇同僞江軍道江於東等盤踞徽州婺源縣之小坑提督張天
祿等率兵進剿常淇及妻子並其黨俱就擒命斬之○丙戌以于

清廉爲右僉都御史巡撫保定

由保定兵備道僉事遷

劉武元爲右副都御

史巡撫南贛

由天津兵備道右參政遷

○戊子革山西左布政使王點職逮問

以督臣馬國柱劾其違制刊刻科場條約令生儒各戴儒巾教官

紗帽去翅也○甲午位育宮成

上御殿受朝賀○丁酉定諸王

入朝降輿及朝列坐次儀注輔政王入午門至太和門降輿德豫

親王肅親王英郡王入午門至昭德門降輿諸王俱午門外降輿

其朝列坐次英郡王與親王同詣郡王視親王稍後外藩科爾沁

國土謝圖親王巴達禮卓禮克圖親王吳克善位與親王同列巴

圖魯郡王滿朱習禮位次英郡王其餘藩王及平西王吳三桂恭

順王孔有德懷順王耿仲明智順王尚可喜坐位俱次諸郡王○

陝西巡按趙端奏賀珍等賊盤踞興安副將任珍等於十一月十

三日率兵往剿賊望風遁副將王平等追擊大破之斬首三千餘

級收降一千五百餘人獲厥馬器械甚眾○是歲鹽三百三十二萬八千七十一引鹽課銀一百五十一萬八千一百三十一兩二錢五分有奇鑄錢六萬二千四百八十二萬三千九百六十有奇

東華錄

順治八

臣王先謙敬編

臣周瀚蕃恭校

順治四年丁亥春正月癸卯朔朝鮮來貢○丙午河南巡撫吳景道以芝草產於嵩山表賀得旨政教修明時和年稔方爲祥瑞芝草何必稱奇○鳳陽巡撫陳之龍奏官兵援如皋搗焚李七趙雲等賊巢斬級千六百有奇○丁未諭文武各官嗣後凡隨征出差不得受地方官員餽遺○戊申命輔國公鞏阿岱內大臣吳拜何洛會等率師征宣府○己酉禁鹽丁投充王貝勒等已投充者革除○庚戌漕運總督王文奎坐擅免荒田租賦及瀆請故明陵寢祀典革職下刑部議罪○壬子遣梅勒章京董阿賴率師駐防杭州○增陝西興安鎮總兵一兵四千名○湖廣總兵官柯永盛奏

興國州等處寨寇悉平下兵部察敘初陳友諒遺孽分爲柯陳二姓盤踞江西武甯湖廣興國而居興國者尤蕃衍黠悍迄明之世爲患將三百年有柯抱冲者與何騰蛟結連自立爲王以其黨陳珩王爲帥倚山結寨焚劫郡縣攻陷興國州殺武昌同知張夢白勢甚猖獗鎮臣柯永盛同按臣吳贊元遣將征剿十日內凡八戰皆敗之俘斬無算焚其巢穴生擒抱冲珩王斬之餘黨悉平前後獲婦女四百餘口贏馬二百匹俱分給有功將士及陣亡官兵家屬○乙卯以楊聲遠爲淮揚總督由登萊巡撫遷黃爾性爲陝西巡撫署甯夏巡撫○己未山東巡撫丁文盛奏范滕東阿等縣土寇平○辛酉以朱國柱爲右副都御史巡撫登萊由江南左布政使遷○壬戌陝西巡按趙端奏官兵擊敗延慶賊渠郭君鎮終南賊渠孫守法生擒椒溝賊渠姚科耿三桂斬獲無算○招撫江南大學士洪承疇奏總兵

官卜從善黃鼎等擊安慶賊渠趙正大破之生擒數十人斬首五百餘級獲器械甲冑無算○初赤斤蒙古都督永柱哈密衛畏兀國都督帖木耳卜喇等於明季入貢值寇亂劫去貢物敕印寄居肅州至是詣撫臣張尙求爲奏請改給敕印竝乞口糧願照舊效忠納貢尙以聞奏下部議○癸亥禮部議封世子例查故明諸王世子俱分封外省此例難循應選擇吉期先行祭告 太廟屆期

上御太和殿諸王文武各官俱令齊集照封諸王例宣讀金冊賜以冊印授封旣封世子其爵秩視郡王賜以嵌珠頂帽朝帶朝衣得旨其頂戴用珠視郡王俱增一顆所用金珠玉及所服朝衣蟒段從庫內給發製金冊金印告竣之日卽行冊封其祭告 太廟及冊封日所行典禮再行具奏世子儀仗照親王例製造○丁卯允禮部請命會試取中三百名不必分南北中卷同考官十八

員○庚午罰輔政鄭親王濟爾哈朗銀二千兩革刑部尚書吳達海啟心郎額爾格圖世職副理事官故敏鞭五十折贖以王殿臺基踰制及擅用銅獅龜鶴吳達海等議罪徇情故也○授三等公拜尹圖爲鎮國公以征喀爾喀部土謝圖汗碩雷汗屢著戰功也○授二等鎮國將軍錫翰爲輔國公以宗室加恩也○贈死事特木德克等官○山東巡撫丁文盛坐縱盜致州縣失守削職下刑部究擬○辛未命給直省文武官員敕書及精微批兼書滿漢字三月癸酉以張儒秀爲右僉都御史巡撫山東由直隸霸州道副使遷○乙亥署兩廣總督佟養甲奏官兵平梧州○丁丑命戶工二部十九處關差漢官外增滿洲官十九員漢軍官十九員○陝西總督孟喬芳奏賀珍等殘孽出沒漢中孫守法盤踞興安胡向宸負固不服副將王平等勦賀珍劉二虎夥賊於興安斬向宸於板橋南山

困守法秦四子於椒溝下部察敘○癸未詔曰自平定中原以後
浙東全閩尙阻聲教百姓辛苦墊隘無所控訴朕甚憫焉爰命征
南大將軍貝勒博洛振旅而前既定浙東遂取閩越先聲所至窮
寇潛遁大軍掩追及於汀水朱聿釗就滅列郡悉平願惟僭號阻
兵其民何罪昭茲大賚咸與維新一切官民人等從前犯罪咸赦
除之橫征逋賦概與豁免山林隱逸各以名聞錄用民年七十以
上給米絹有差○己丑招撫江南大學士洪承疇奏故明宗姓僞
瑞王朱議賁與湖賊趙正俱就擒命斬之○乙未征南大將軍
多羅貝勒博洛奏廣州府僞唐王朱聿釗弟聿鎮僭號紹武署兩
廣總督佟養甲署提督李成棟帥師進剿斬聿鎮竝僞周王肅宗
益王思穴遼王術雅鄧王器鼎鉅野王壽鏞通山王蘊越高密王
宏椅仁化王慈魴鄢陵王肅訥南安王企壠周王世子恭探遼王

世子儼錄宗姓由悟慈剽獲偽王及文武官員印記共三百九十

顆廣郡悉平命敘有功將士其祭告詔赦事宜令所司擇吉以聞

○丁酉以趙福星爲江南左布政使由兵備道董聖宗爲山東左

布政使由東兗道孫茂蘭爲山西左布政使由直隸薊州張文衡

爲江南按察使由廣甯道董天機爲山西按察使由陝西閩南道○鄖陽

撫治潘士良以不稱職解任○降江南巡撫土國寶一級調外用

以擒獲奸細王伯時不請旨擅殺也○戊戌以佟國鼎爲右叡都

御史巡撫福建由巡鹽御史遷○實授福建委署各官以朱鼎新爲左布

政使由中書遷趙林翹爲右布政使由進士遷楊御蕃爲按察使由總兵遷

三月戊申革庶吉士袁禱如職以會試分考擅改株卷也○降保

定巡撫郝晉爲山西按察使司副使懷來道○庚戌保定巡撫于

清廉奏土賊寇河間府兵備道王維新自縊知府王德教河間縣

典史鄒鯤俱被害○辛亥山東巡撫下文盛奏官兵追擊陷河間
土賊於鄒平剿滅之○癸丑候缺參將序大生訐奏李建泰受故
明殊恩投賊於保定及我朝宥罪錄用乃怙終不悛受賊罷職今
復鴟伏曲沃招納亡命謀爲不軌逆迹多端請逮繫來京正法下
兵部鞠訊○甲寅初兵部侍郎李元鼎薦其門下人倪先任於順
天巡撫柳寅東寅東收用給以牌札尋馬賊劉傑等被獲稱先任
同黨下刑部議擬元鼎棄市寅東革職杖責得旨免元鼎死及寅
東杖責俱革職○乙卯諭兵部近來盜賊竊發謗言繁興人民惶
惑無端驚避深可軫念茲特開自首之門許以更新之路務使盜
賊革心良民安業自今以後凡曾經爲盜之人無論犯罪輕重有
能赴所在官司或徑赴兵部將真賊姓名及住居地方詳細陳首
者除本身免罪外仍將賊賊酌議給賞如脅從多人同心歸正首

告賊渠者罪止賊渠來首人悉免究治仍以賊渠贓物分賞如良民告發賊情該地方官卽時密擒毋得稽延時刻質審有據者有賞儻有無賴營利及讒口誣害者反坐不赦至於左道妖人妄談禍福游手無賴喜布謠言無非驚動煽惑欲致遷徙流移以便劫掠見今大兵除剿之處俱係反叛作亂眞賊原不波及無辜凡我良民毋得輕言妖謠自取困苦爾部作速出示曉諭仍通行各該撫按榜示通知○丙辰殿試天下貢士李人龍等制策曰帝王之治天下莫不以得人爲急務朕深維眞才希覲知人實難如以言貌取人慮有內外不符妍媸互異者如以薦舉進用慮有朋黨援引眞廣溷淆者如以博學能文而遽信其存心行事又每有下筆千言侈談堯舜而中藏奸佞莅官汙穢者必如何而後眞才可得歟近聞見任官員伯叔昆弟宗族人等以及廢紳劣衿大爲民害

往往壓奪田宅占攫貨財陵暴良善抗違國課有司畏懼而不問
小民飲恨而代償以致貴者日富貧者日苦明季敝習迄今猶存
必如何而後可痛革歟今當混一之初尙在用兵之際兵必需餉
餉出於民將欲減賦以惠民又慮軍興莫給將欲取盈以足餉又
恐民困難蘇必如何而後能兩善歟爾多士家修廷獻正在今日
務各出己見逐條獻策勿用四六不限長短毋得豫誦套詞拘泥
舊式重負朕意朕寤寐真才不啻饑渴多士宜深體恪遵明切敷
對朕將親覽焉○戊午賜殿試貢士呂宮等三百名進士及第出
身有差○己未招撫湖廣兵部右侍郎江禹緒引疾乞休允之○
調周伯達爲右僉都御史巡撫江甯由署甘肅趙兆麟爲右僉都
御史撫治鄖陽由延綏耿焞爲右僉都御史巡撫順天由江○庚
申諭吏部今當天下初定之時在京三品以上及在外總督巡撫

總兵等俱爲國宣力著有勤勞與平時循分供職者不同朕用是特沛殊恩無論新舊各准送親子一人入朝侍衛以習本朝禮儀朕將察視才能授以任使如無親子准送親弟或親兄弟之子宗族遠支毋得濫送嗣後諸臣縱有過犯經朕罷斥其侍衛者如故○壬戌免江南崇明鹽課馬役銀○乙丑大清律成頒行中外○丙寅敕平騰機思及流寇功授三等鎮國將軍瓦克達爲鎮國公一等鎮國將軍穆爾祜爲輔國公餘升授有差贈死事者官子弟襲職○署兩廣總督佟養甲奏高雷廉三府平定○丁卯令祀郊社太牢仍用腥○己巳諭戶部前令漢人投充滿洲者誠恐貧窮小民失其生理困於飢寒流爲盜賊故諭願投充滿洲以資餬口者聽近聞漢人不論貧富相率投充甚至投充滿洲之後橫行鄉里抗拒官府大非軫恤窮民初意自今以後投充一事著永行停

止○庚午諭戶部滿洲從前在盛京時原有田地耕種凡贍養家口以及行軍之需皆從此出數年以來圈撥田屋實出於萬不得已非以擾累吾民也今聞被圈之民流離失所煽惑謠言相從爲盜以致陷罪者多深可憐憫自今以後民間田屋不得復行圈撥著永行禁止其先經被圈之家著作速撥補如該地方官怠玩不爲速補重困吾民聽戶部嚴察究處著作速行文該撫按誕告吾民咸使聞知○達賴喇嘛及班禪胡土克圖表頌功德獻方物

夏四月壬申朔以陳泰爲禮部侍郎

由理事官遷

○甲戌喀爾喀部邁

達禮胡土克圖等來貢○乙亥調譚拜爲吏部尙書以阿哈尼堪

爲兵部尙書

由禮部侍郎遷

○以噶達渾爲戶部侍郎○丙子喀爾喀部

伊拉古克三胡土克圖等來貢○喀爾喀部嘛哈撒馬諦塞臣汗

等各遣使表請通好貢方物諭曰前蘇尼特部落騰機思舉國來

歸朕卽以女妻之又封之爲王優禮恩養及彼背德叛逃因命和碩德豫親王率輕騎追剿此朕討叛之師與爾等何涉爾等乃遣兵迎犯故天降譴於爾也朕於此時曲賜優容卽命班師若果素念爾惡豈不能乘爾自遭天譴之時以見在之兵卽加征耶今爾等如欲安居樂業能擒騰機思等則席卷其國來獻不能卽當用兵剿滅騰機思收服其國則我師亦不煩再遣儻又不能可遣爾親信大臣來質朕令偏師前往任彼逃遁何所亦無難剿之也朕所以必令爾以親信大臣爲質者蓋以大興師眾卽擾爾國量遣一旅又恐爾心叵測之故耳爾果克遵朕旨當及未雨雪之時速遣使來儻尙懷攜貳則不必遣使○喀爾喀部俄木布額爾德尼來貢○丁丑故明總督田仰帶領兵丁三千名馬羸二百匹投誠○以成仲龍爲陝西按察使兼布政使司參議管右布政使事

由山

西岢嵐道
參政遷

○己卯湖廣巡撫高士俊奏收撫長沙招降偽總兵及

參遊知縣偽官舉貢三十一人兵三千五百名獲船三百艘○陝

西巡按趙端奏昂邦章京傅喀蟾擒勦賊渠劉文炳郭君鎮盡殲

黨羽○庚辰贈殉難甯夏巡撫焦安民爲右都御史蔭一子入監

讀書○順天巡按廖攀龍奏勦撫土寇捷音奏內稱皇叔父攝政

王爲九王爺命革攀龍職下刑部擬罪○癸未以周亮工爲福建

按察使

由江南揚州兵備道參政遷

○乙酉征南大將軍貝勒博洛凱旋隨征

貝子和託薨於軍是日喪至令親王以下出郊迎奠固山額真公

圖賴亦卒於軍喪至遣內大臣索尼等迎奠之○丁亥喀爾喀部

額爾德尼願賜等來貢○戊子流通集決口工成○己丑予河間

府殉難兵備道副使王維新知府王德教典史邵鯤官廕○辛卯

一等公塔瞻卒○江甯巡撫土國寶奏蘇松提督吳勝兆謀叛殺

死方姓推官楊姓同知督標將官高永義等立縛勝兆竝同謀之陸回獲僞銀印一顆隨解江甯內院臣洪承疇研審確情請旨發落其叛黨馬雄顧友成逃脫命察永義等功次竝二廳官被殺情由脫逃叛黨嚴緝務獲○中書舍人孫允裕以親老病請假省視得旨官員託故告歸多係偷安嗣後各衙門官員請假令該堂官代題不許自行瀆擾○陝西巡按趙端奏慶屬地方向緣賀珍等倡逆各處響應焚掠幾無虛日令戶部侍郎屠賴率兵剿殺逆寇三千餘名招撫各堡竝獲婦女牲畜甲冑弓矢槍礮等物地方漸臻甯謐下部察敘○湖廣右布政使崔光前以病致仕○甲午戶部奏酌議官員經費文職官員除額設俸薪外有必不可缺之費用衙役等項所以資養廉供使令也前朝半取給於額派半取給於贖鍰殊無畫一之條今取舊贖悉心參酌自督撫按藩臬守令

以及佐貳敎職按官之崇卑事之繁簡以定經費衙役之多寡卽明列條編冊中照數徵派按委關支此外毫有私增卽計贓論罪從之○陝西巡撫趙端奏官兵計取賊首孫守法命傳首陝西○丙申遣每旗侍衛二員護軍十人往滿洲莊屯巡察生事擾害之人○喀爾喀部塞勒胡土克圖等來貢○丁酉諭戶兵二部朕出斯民於水火之中統一天下滿漢一家用享昇平豈有歧視之理朕見刑部所奏有滿洲阿爾代誣殺漢人張可材搶其家貲一案隨令審實斬訖示眾近聞滿洲有搶奪良民財物者復有漢人投充滿洲借勢橫行害我良民者殊干法紀嗣後被害漢人遇彼不法之徒須記其姓名控告該地方官卽行申部該部究其情之輕重嚴行定罪不得絲毫偏袒至漢人亦不得因朕此旨反肆妄誣著滿漢官員悉體朕意各將該管人等嚴行曉諭戶兵二部速書

滿漢諭旨誕告天下各府州縣鄉村務令滿漢人等一體遵行○
甘肅巡撫張尙坐題報本內稱皇叔父遺攝政王三字革職擬罪
○山東土寇陷鄒平禹城等十五州縣巡撫丁文盛坐不能撲剿
奏報遲延部議褫責命降一級調用○戊戌吏部奏新中進士應
選州縣正官方亨咸李人龍等援例乞恩就教得旨進士多求改
教明係規避仍著依次挨選本職以後不許瀆奏○庚子喀爾喀
部滿朱習禮胡土克圖等來貢○兵部奏山海關外地土原以一
半給與平西王一半仍畱土著人民爲業茲議鐵永官兵家口仍
居本地以便耕種其各兵歸隸山海總兵標下以足營額從之○
安徽巡撫李棲鳳奏總兵李仲興副將許漢鼎等擒僞總兵江烏
副將吳繼陳國柱鄭思祥監軍道蘇坤等斬級甚多招撫僞總兵
副參監紀張天麒等十人命將吳繼等正法張天麒等覈議有功

將士敘賚

五月辛丑朔開廣東鼓鑄○壬寅江南巡撫土國寶奏舟山海寇沈廷揚等聯鯨復犯崇明遊擊李雲龍等分兵追剿廷揚就擒俘斬賊兵千餘湖海諸寇悉平○乙巳諭喀爾喀扎薩克圖汗曰爾來書云漢人八十萬眾原係我攻城敵也今乃爲紅纓蒙古所得我朝原係紅纓滿洲所稱蒙古爲誰爾來書不名又爾我相稱意欲與我敵體乎爾書云蘇尼特向從此地逃去又復來歸爾等追逐至此與伊思丹津拖音達賴濟農合戰我等欲前來分理曲直爾師竟回額爾克楚虎爾私掠巴林亦欲前來分理曲直夫巴林蘇尼特二罪素知與爾無干爾果能議今卽與爾定議爾當自審果能否乎如果能當盡執若輩來獻若徒侈口驕言妄行何益誠欲通好爾當遵行禮法悉改前愆及此未雨雪之前遣使前來如

不遵旨可毋遣使○諭伊思丹津喇嘛曰前蘇尼特騰機思舉國
來歸尙格格封王爵恩養甚優乃負恩叛去因命德豫親王以偏
師追逐之爾出師迎敵致天降譴我朝與爾素無嫌隙而二楚虎
爾掠我巴林今爾如欲安生樂業可將二楚虎爾所掠巴林人畜
等物散失者照數賠補見存者盡行送還以駝百頭馬千匹前來
謝罪儻能遵旨及此未雨雪之時卽遣使全送如不遵旨可毋遣
使○諭澤卜尊丹巴胡土克圖曰爾來書已悉覽朕非好啟兵端
若執送騰機思竝其國來歸及所掠巴林人畜全數送還謝罪則
已不然朕復何言賜俄木布額爾德尼敕諭同○開河南鼓鑄○
己酉初故明廢紳侯峒曾等遺奸細潛通僞魯王爲柘林遊擊陳
可所獲中有僞敕一道反間招撫大學士洪承疇及巡撫土國寶
事聞覺其詐於是諭江甯等處昂邦章京巴山張大猷曰爾等鎮

守地方遇有亂萌及奸細往來嚴察獲解具見爾等公忠盡職人
學士洪承疇巡撫土國寶皆因效力我朝故賊用間諜誣陷總兵
吳勝兆監收奸細謝堯文供稱嘉定縣廢紳侯峒曾子侯懸漸等
具逆疏付堯文潛通魯王爾等卽將奸細謝堯文窩逆之孫梢及
有名各犯拘提到官公同大學士洪承疇操江巡撫陳錦嚴行審
究具奏又諭洪承疇土國寶曰順治四年四月初四日柘林遊擊
陳可搜獲敕一道內云封承疇爲國公國寶爲侯爵又黃斌卿密
書內云承疇所具本章已爲轉奏國寶二次密字亦已轉奏國主
訖又云內仗承疇殺巴張二將外託國寶靖除地方則江南不足
定等語朕見此益知賊計直同兒戲因卿等皆我朝效力大臣故
反間以圖陰陷朕豈墮此小人之計耶卿等當益勵忠勤以報國
恩勿以此介意○庚戌免湖廣興國州江夏等十州縣去年旱災

額賦○壬子以遲日益爲湖廣右布政使

由荆西道副使遷

○癸丑實授

廣東委署各官以修養甲爲兵部尙書兼右都御史總督兩廣兼

巡撫廣東

由總兵官遷

耿獻忠爲左布政使

由貢生遷

○丙辰江西巡撫吳

贊元奏江右南瑞袁三府先因陳友諒割據倍徵故明因循未改兼以水漂沙塞虛糧逋欠甚多亟請釐定令照他郡額賦徵輸更行清丈各官履畝親查見在荒蕪盡與豁免其有近山易旱近水易潦者雖係上田亦當改與輕則庶賦役均平殘黎可生章下部議○己未招撫江南大學士洪承疇奏故明推官陳子龍陰受僞魯王部院職銜結連太湖巨寇潛通舟山餘孽章京索卜圖計擒之子龍投水死湖海諸寇聞風解散蘇松一帶漸平○浙閩總督張存仁奏海寇周崔芝據福州鎮東衛竝海口民城屢肆剽掠前將滿進忠等分兵擊之兩城俱下又賊黨岑本高犯浦城爲副前

李繡所敗斬獲甚眾地方平定○辛酉投誠伯常應俊總兵李際
遇馬儒齋黃明先丁啟光副將王士永夏五岳賈應達駱和蕭劉
方侯參將喬松遊擊滕和齊于起範馮可松傅有功都司馬崇臣
衛士龍守備李豪張嵩閒散官丁啟睿等坐與賊黨王道士通謀
竝其兄弟及子俱伏誅○癸亥 上幸南苑○乙丑以閩廣平定
遣官祭告 福陵 昭陵○戊辰禮部奏查諸王印文例故明親
王用一字郡王用二字本朝諸王印文或照前朝篆給或照封王
號全寫得旨一朝有一朝之制不必照故明止用一字我朝諸王
印文照封號全寫又奏平西王應乘輜與否相應請旨得旨平西
恭順智順懷順各王著於駐鎮地方乘輜至京令乘馬行走○吏
部侍郎祖澤洪以愚閭不稱職解任

六月壬申免直隸成安等七縣去年被災稅糧○癸酉轉趙京仕

爲工部左侍郎以王永吉爲工部右侍郎

由大理寺卿遷

○丙子先是有

詔責朝鮮貢獻怠玩至是國王李倧遣第三子湄來朝奉表謝罪

竝貢方物○大理寺卿王永吉以升工部右侍郎具奏控辭得旨

有心願居官而徒尙虛名或一次再次控辭者皆是踵明朝故套

已有明旨再有控辭者卽允所辭永不錄用王永吉何得不遵明

旨著革職永不錄用○初琉球安南呂宋三國各遣使於明季進

貢閩未還大兵平閩執送京師命賜三國貢使李光輝等衣帽

段布仍各給敕諭遣赴本國招諭國王諭琉球國王敕曰朕撫定

中原視天下爲一家念爾琉球自古以來世世臣事中國遣使朝

貢業有往例今故遣人敕諭爾國若能順天循理可將故明所給

封誥印綬遣使齎送來京朕亦照舊封錫諭安南呂宋二國文同

○戊寅江南投誠總兵官高進忠僕馬良玉首進忠隱藏兵備潛

帶假辦鞫實伏誅○己卯遣戶部副理事官繆尙義等赴廣東廉州等處珠池採珠○庚辰兩廣總督佟養甲奏招降故明趙王朱由校總兵李志璉○南贛總兵官柯永盛奏遊擊楊遇孔國治等解安遠縣圍破賊兵萬餘人降三十餘寨賊巢悉平○乙酉山西巡撫申朝紀奏鄉甯縣民楊春暢左道聚眾據寨倡亂平陽營副將范承宗等勦平之○丙戌以劉昌爲工部右侍郎由太僕寺卿遷○丁亥襄陽總兵官王光恩有罪被逮弟王光代王成遂叛法司引律論光恩斬得旨光代等聞兄被逮驚叛亦未可知不可遽以謀叛讞獄況人命至重恐涉冤枉著再詳鞫○戊子免陝西綏德衛去年雹災額賦○己丑冊封故多羅饒餘郡王阿巴泰子貝勒博洛爲多羅郡王冊文曰爾貝勒博洛破流賊滅福王平定河南江南時爾佐和碩德豫親王以行王分兵一半令爾招撫蘇州杭州

等府地方爾獲故明惠王潞王等親王郡王五人世子一人巡撫張鳳翔等文武官員六十八人降其兵二萬五千八十人戰敗敵兵凡十五次又攻克三府七縣遂平定江南常州蘇州等府十三州縣浙江杭州等府二十一州縣又平定福建浙東時以爾爲征南大將軍爾渡錢塘江抵浙東敗敵二次克取金華府擒斬蜀王朱常農等三人僞閣老馬士英僞國公方國安等大小五十五員收降文武官大小三百一十四員馬步兵一萬四千三百七十人平定八府五十三縣地方繼入福建誅僞唐王朱聿劍等僞親王郡王七人世子一人將軍二人總督一人伯一人巡撫一人共敗敵兵二十四次收降僞國公鄭芝龍等大小官二百九十一員馬步兵十一萬三千人八府一州五十八縣地方悉皆平定以及江西四縣之地故進封爲多羅郡王賜之冊印爾其欽哉○癸巳陝西

總督孟喬芳奏逃竄逆賊武大定攻陷紫陽縣結連仁河南山僞
官覃遠許不惑等倡亂興安總兵官任珍擊敗之斬首二千餘級
巢穴悉平○湖廣巡撫高士登奏大軍攻拔衡山安化新化龍陽
等縣衡州常德二府生擒僞總兵黃朝宣及副將遊擊通判等官
斬首三千餘級○甲午蘇松提督吳勝兆謀反鞠寶伏誅○丁酉
免山東去年荒地額賦○以尼堪爲理藩院尙書

由本院
侍郎遷

東華錄

順治九

臣王先謙敬編

臣周淪蕃恭校

秋七月庚子朔攝政王傳集內大臣各部尙書啟心郎等諭之曰
茲內大臣禮部僉以和碩德豫親王勦滅流寇底定陝西殄福王
平江南及擊敗喀爾喀部落土謝圖汗碩雷汗厥功甚懋應進封
爲輔政叔德豫親王子初亦念及此尙以王爲子季弟故猶豫未
果然予恭攝大政簡賢黜不肖國之鉅典烏容瞻顧爾等偕諸王
定議以聞眾僉以爲然於是進德豫親王多鐸誠之曰汝繼子輔
政益加勤勉斯名譽非小矣○辛丑上御太和殿冊封和碩德
豫親王多鐸爲輔政叔德豫親王賜金千兩白金萬兩鞍馬一匹
空馬九匹增冊文曰定鼎中原以來所建功勳卓越等倫因封輔

政叔德豫親王是日大宴○壬寅湖北巡按曹叶卜奏叛逆王光代盤踞鄖陽妄用永曆年號僭稱鎮武伯官兵進剿提督孫定遼敗績莫知所之○癸卯建射殿於左翼門外○以齊國儒爲湖廣左布政使

由荆南道參政遷

○甲申免江南徐州去年荒地額賦並漕米

之半○乙巳攝政王諭內院六部都察院理藩院等衙門曰前令輔政德豫親王和碩鄭親王共聽政務今和碩鄭親王已經停罷止令輔政德豫親王與聞凡各部院事務有應親理者有應輔政德豫親王代理者開列具奏○己酉封敖漢部班第額駙子墨爾根巴圖魯爲多羅郡王○庚戌禁民間行使制錢不許以一當二違者治罪○壬子鄂爾多斯部濟農等來貢○癸丑以申朝紀爲兵部右侍郎兼右副都御史總督宣大山西

由山西巡撫遷

○丁巳遣侍郎喀喀木等率師征鄖陽○戊午調馬國柱爲兵部尙書兼右都

御史總督江南江西河南

由宣大總督調

○庚申浙閩總督張存仁奏莒

州洞賊李長蛟僞軍師王國用陳泰鐘等陷建甯府總兵官李應宗副將曹允吉死之海賊亦於是日進口燒斷漳州江東橋皆係鄭彩諸逆爲祟長泰海澄龍溪盡爲賊出沒之所餘黨分寇同安安溪諸處○癸亥扎魯特部桑圖台吉等來貢○甲子詔曰自平定中原以後粵東尙爲唐藩諸逆所阻嶺海之外聲教未達稅畝增科越年橫斂百姓辛苦墊隘已非一日朕移平南之師席捲惠潮遂達省會念爾官民僻處遐荒初非後至一切罪犯咸赦除之逋賦橫征概與豁免民年七十以上加賜粟帛所在節孝者旌山林有才德者錄用南海諸國能向化者待之如朝鮮○乙丑立多羅饒餘郡王阿巴泰墓碑文曰爾阿巴泰乃太祖武皇帝側室子也以行間著績於崇德元年封爾爲饒餘貝勒後圍明錦州復

能宣力乃統兵略山東郡邑又多克獲以屢奏軍功於順治元年
晉封爾爲多羅饒餘郡王不幸遽爾奄逝特諭所司勒碑墓所用
申哀悼○丙寅以祝世昌爲右副都御史巡撫山西○吏部奏故
明兵部尙書張縉彥逡巡來歸不應錄用從之○戶部奏故明勳
戚田地賞賚及私占者俱應入官自置者仍給本人贍養與民一
體納賦從之○丁卯 上幸邊外閱武是日駐蹕沙河

八月己巳朔贈殉難陝西商洛道僉事袁生芝興安州知州曲良
貴官廕州判侯嘉九石泉縣主簿胡孟遴典史夏德化官○陝西
巡撫黃爾性奏固原武大定叛時總兵官何世元遇害副使呂鳴
夏抗賊不屈死遊擊周存德馬應熊守備趙文光董師吉魏尙忠
俱死於敵應請優卹奏下所司○庚午江西提督金聲桓奏擒獲
故明宗姓偽麟伯王霸伯王於瀘溪山命斬之○甲戌 上駐蹕

西巴爾臺蘇尼特部噶爾馬等獻馬○左副都御史惠世揚以年老致仕○丙子 上駐蹕海流土河口歸化城土默特部章京古祿格等獻駝馬○丁丑蘇尼特部杜稜郡王等獻馬○戶部議覆兩廣總督佟養甲奏佛朗西國人寓居濠鏡澳以其攜來番島貨物與粵商互市蓋已有年後深入省會至於激變遂行禁止今督臣以通商裕國爲請然前事可鑒應仍照故明崇禎十三年禁其入省之例止令商人載貨下澳貿易從之○壬午 上駐蹕察漢諾爾烏朱穆秦部蘇勒親王阿霸垓部卓禮克圖郡王率其屬朝見獻牛馬○甘肅巡撫張尙坐擅開礦稅降調○乙酉定遠大將軍肅親王豪格等奏貝勒尼堪貝子滿達海固山額真杜雷覺羅巴哈納準塔巴圖魯馬喇希護軍統領熬拜巴圖魯墨爾根侍衛李國翰護軍統領哈甯噶車爾布德爾得赫等分兵征剿遵義夔

州茂州榮昌隆昌富順內江資陽等處斬僞王及巡撫道官總兵副參遊都守一千餘員兵丁無算獲馬羸一萬二千四百餘川寇悉平○丙戌 上駐蹕胡蘇臺蒿齊忒部博羅特額爾得尼等朝見獻鷹馬○戊子山東淄川縣知縣劉修已教官成棐坐失城棄市○甯夏巡撫胡全才奏叛逆馬德糾眾倡亂發兵進剿自豫望城追至河兒坪殺賊千餘殲其渠馬德及李國豪等餘黨悉平○庚寅開湖廣鼓鑄○江甯巡撫劉今尹奏徽州僞總兵余希生等就擒餘眾潰散張公山各寨悉平○辛卯以張文衡爲右僉都御史巡撫甘肅由江南按察使遷○癸巳以江西水旱發倉米三千餘石減價糶賣以濟饑荒從巡撫章于天請也○乙未降補原任江甯巡撫土國寶爲江南布政使司參政兼僉事管按察使事○丙申上還京師○先是綠旗各鎮兵月餉騎兵有每月給銀一兩五錢

者有給銀一兩者步兵有給銀一兩者有給銀八錢者今定有馬戰兵每名按月給銀二兩無馬戰兵每名按月銀一兩五錢守兵每名按月給銀一兩

九月庚子厄魯特部顧實汗來貢○辛丑京師地震○丙午轉金

柱爲浙江左布政使

由右布政使轉

○戊申直隸天津巡撫張忻坐剿靜

海等處土寇失利掩飾降調○辛亥淮安土賊張華山等用僞隆

武年號嘯聚賊眾千餘攻據廟灣遊擊潘延吉同知耿嘉樂棄城

走俱革職提問○癸丑轉金柱爲浙江左布政使以孟良允爲浙

江按察使司兼參議管右布政使事

由河南管按察使事參議道遷

○裁陝西肅

州參將○裁直隸三屯營總兵以原轄汛地分隸山海密雲兩鎮

移漢兒莊副將駐三屯營協理喜峯太平二路邊口山海總兵官

轄之遵化團練副將協理馬蘭松棚二路邊口漢兒莊仍設參將

一俱密雲總兵官轄之○丙辰改京城十六門守門指揮千戶百戶等官俱爲千總○山東巡撫張儒秀奏土賊丁可澤勾引叛賊謝遷等陷淄川革職兵部尙書孫之獬被賊支解死其孫蘭滋等男婦九人同時遇害○丁巳以李猶龍巡撫天津○戊午諭兵部往昔對陣斬級之例不過慮有虛誑爭混朕思敵人旣已殺死不必割級爾部卽通行禁止○己未陝西總督孟喬芳奏擒獲賊首賀宏器命斬之○辛酉漕運總督楊聲遠奏官兵勦廟灣土賊擒斬甚眾○甲子安徽巡撫李棲鳳以徇縱縣官降調○南贛巡撫劉武元奏瑞金石城興國英德等州縣土賊悉平下兵部察敘○河南巡撫金元禎奏鄖陽賊首王二等犯浙川縣官軍擊敗之下所司察敘

冬十月己巳喀爾喀部扎薩克圖汗來貢○庚午初投誠武毅伯

施福澂濟伯鄭芝豹率十鎮官軍持投誠平國公鄭芝龍牌招撫
白沙至甲子等處驅散巨寇蘇成降僞總兵林榆等別遣總兵施
琅梁立同提督李成棟監軍戚元弼等援剿順德縣海寇多所斬
獲賊首張家玉陷東莞遣黃廷成升等以舟師三千擊敗之三水
等縣告急復遣投誠都督戴忠等率水師抵九江追擊斬獲甚眾
至是捷聞○以王懷爲右僉都御史巡撫安徽

由河南右布政使遷

○辛未

刑部議覆大理寺卿王永吉奏請照例差官往直省恤刑從之○

壬申敘征甯遠錦州杏山山東北直河南陝西山西江南浙江福
建湖廣等處功將士升授有差贈死事者官子弟襲職○喀喇沁

部貝子卓爾弼同其叔戴達爾漢率所部來歸授三等甲喇章京

○甲戌更定鑾儀衛官員品級鑾儀使正三品鑾儀副使從三品

冠軍使正三品冠軍副使從三品雲麾使正四品雲麾副使從四

品治儀正正五品治儀副正從五品整儀副正六品整儀副尉從

六品○丁丑諭戶部制錢行使原定每份七枚小民交易未便今

改定每分十文爾部卽出示曉諭○喀爾喀部額爾齊斯汗下伊赫額

木齊格隆額參德勒哈談巴圖魯等來貢○戊寅初故明太子太

保大學士張四知投誠至京再懇奏請朝見又赴部揭稱守候年

餘進退無憑乞查前後科鈔俯賜裁定吏部議四知匍匐投誠力

疾趨覲但年踰六旬應令致仕回籍從之○偏沅巡撫高斗光坐

蓄髮重犯不行特參降調○庚辰罷淮揚總督楊聲遠職以所屬

鹽城地方土賊猖獗疏於防守也○癸未以吳惟華爲戶部右侍

郎兼右副都御史總督淮揚恭順侯線縉爲右副都御史巡撫偏沅

由河南右布政使遷○甲申以陳維新爲浙江左布政使由直隸昌平○乙

酉浙江巡按秦世禎劾左布政使王敬錫貪污不法命革職提問

○給事中袁懋功奏自古帝王未有不以民命爲重者今在京重犯有立決無秋決而朝審熱審與駕帖三事尙未舉行夫秋後取決緩其死也朝審熱審慎其死也駕帖到部始將重犯押赴市曹見一人之威福至重也請嗣後凡應秋後處決者復行朝審熱審以示矜疑卽應決不待時者必奉駕帖以隆法紀重民命而廣好生下所司知之○丙戌諭外藩該王貝勒貝子曰比聞盜賊繁興自固山額真梅勒章京甲喇章京牛条章京以至十家長俱有管領爾等各能盡職嚴查盜賊何由而起向因盜風少息憫恤羣生夥盜誅渠首一人獨行攘竊者三犯始誅以後夥盜誅其尤者二人獨行攘竊者無赦○遣梅勒章京朱喇瑪率師駐防杭州○曲阜世職知縣孔允瀄居官廉能閭邑士民懇請加銜久任巡撫以聞得旨孔允瀄著加東昌府通判銜仍任知縣事○戊子吏部奏

計典三年一舉乃舊例也目今廣輿大勢漸次盡入版圖請以三載考績爲定制自順治五年至七年合天下之郡吏而大計之庶大典畫一易爲遵守報可○以張大任爲河南右布政使

由山西北道

副使

○侍郎喀喀木奏自河南鄧州至鄖陽會防守光化之陝西

副將王平引兵渡河追賊王光泰及其黨僞總兵李士英等光泰初聞大兵至內鄉卽遁走房縣官兵遂復鄖陽追至房縣斬級萬餘光泰等竄四川官兵畱駐鄖陽勦撫餘黨以次就平○己丑諭入朝侍衛各官子弟內通文理者吏部酌用尋部議監生以通判用廩增附以州同用有未入庠者以州判用從之

時宋學年十五歲擬監生以通

判

○辛卯開江西鼓鑄○壬辰兩廣總督佟養甲奏粵東雷廉二

郡素稱產珠僅有九池廉八雷一皆在洪濤巨浸中取珠之法例用長繩數百丈縋綆沈入海底每果鯨鱷之腹而得珠多寡有無

尚未可知是取珠之艱也前者萬厯年間宦者李敬開採每年協助夫銀不下巨萬是所費又甚繁也向在無事時尚且得不償失況今蹂躪之餘豈堪重有此舉乞 皇上俯念瘡痍緩其開採寬一分之民力卽培一分之元氣矣得旨覽奏知採珠不便於民差官著卽撤回○甲午天津巡撫張忻坐地方失事謫降尋以病致仕○初絳州賊首鄭登啟與鄭懷法糾眾作亂懷法被擒登啟亡入稷山縣北山走馬嶺寨自稱大成教師糾合妖僧王月天王明及故明宗姓朱梅川劉駁等聚山頂廟內借名答醮謀爲不軌至是就擒命斬之○乙未江西巡撫章于天奏遣副將徐文燦湯執中領兵勦吉水縣賊王來八等斬獲甚多

十一月丁酉朔江西巡撫章于天奏廣信弋陽鉛山崇仁逆寇悉平○戊戌漕運總督楊聲遠奏擒獲僞義王朱泚並其子果命斬

之○己亥喀爾喀部扎薩克圖汗下邁達禮胡土克圖厄魯特部
阿布賚諾顏下訥門汗等來貢○南贛總兵官柯永盛奏甯都逆
寇平○庚子贈殉難陝西固原道副使呂鳴夏官廕○癸卯兩廣
總督佟養甲奏斬擒逆賊陳邦彥等下兵部察敘○甲辰以陳極
新爲江南右布政使○庚戌以侍郎陳泰爲靖南將軍偕梅勒章
京董阿賴等征福建○辛亥免山西靜樂等十四州縣所堡被蝗
額賦山東歷城等十五州縣被水額賦○壬子裁山東明季添設
牙雜二稅○招撫江南大學士洪承疇奏犯僧函可係臣會試房
師故明禮部尙書韓日纘之子出家多年於順治二年正月內自
廣東來江甯刷印藏經值大兵平定江南粵東路阻未回久住省
城臣在江南從不一見今以廣東路通回里向臣請牌臣給印牌
約束甚嚴因出城門盤驗笥中有福王答阮大鍼書稿字失避忌

又有變記一書干預時事函可不行焚毀自取愆尤臣與函可有世誼理宜避嫌情罪輕重不敢擬議其僧徒金獵等四名原係隨從歷審無涉臣謹將原給牌文及函可書帖封送內院乞敕部察議得旨洪承疇以師弟情面輒與函可印牌大不合理著議處具奏函可等著巴山張大猷差的當員役拏解來京尋部議承疇革職得旨寬免○癸丑江西巡撫章于天奏東安縣逆寇平擒僞瑞昌王朱統鑒得旨朱統鑒著正法有功官兵下所司察敘○丙辰以武延祚爲山東按察使由山西冀南道僉事遷○江南巡撫宋調元坐濫舉遊擊潘延吉湖南巡撫張懋禧坐湘鄉縣酈攀龍通賊一案不詳加嚴訊俱降調○戊午增四川總督一○五鳳樓成○甲子平南大將軍恭順王孔有德以平湖南捷聞下所司議敘

十二月丁卯江西提督金聲桓奏吉安等處僞官郭應銓等受永

歷僞職盤踞龍泉山中與渠魁王來八勾連作亂殘害地方遣副將劉一鵬率兵撲剿擒賊渠王子凌郭應銓等斬獲無算○戊辰免直隸保定河間真定順德被蝗額賦○壬申張存仁引疾乞休許之以陳錦爲兵部右侍郎兼右副都御史總督浙閩由操江巡撫遷○癸酉浙江巡按秦世禎奏逆賊黃斌卿擁船八十餘號直犯甯波總兵官張杰堵截夾攻斬級無算擒賊渠俞國統等二十四人○甲戌以李日芄爲右副都御史巡撫操江由左僉都御史遷○己卯以太宗皇帝第十一女固倫公主下嫁阿霸垓部喀爾瑪索訥木○贈死事半箇牛条章京費雅珠官○癸未陝西總督孟喬芳奏興安總兵官任珍剿殺賊首米國珍李世英等餘黨悉平下所司議敘○甲申禮部遵諭議定固山額眞昂邦章京護軍統領梅勒章京甲喇章京牛条章京前鋒統領前鋒參領皆係管兵職銜不論

世職大小有無授此官者卽照此銜書之凡箭號等項亦書此銜於上其世職昂邦章京改爲精奇尼哈番梅勒章京改爲阿思哈尼哈番甲喇章京改爲阿達哈哈番牛系章京改爲拜他喇布勒哈番半箇前程改爲拖沙喇哈番其在部院官員及各省駐防章京官銜俱仍照舊○蘇尼特部台吉吳巴什等來歸○丙戌平南大將軍恭順王孔有德等奏臣等自岳州進兵長沙僞巡撫何騰蛟總兵王進才先遁隨遣梅勒章京卓羅藍拜等探其所向遇進才部賊捨舟登岸逆戰卓羅等擊敗之我師次湘潭聞僞平南伯黃朝選擁賊十三萬屯於燕子窩臣率梅勒章京藍拜屯泰等由水路進至蘆口擊破北路賊營智順王尙可喜同卓羅等由陸路進至渚州遇僞總兵徐松節引馬步賊一萬三千逸去追擊敗之朝選走衡州臣等星夜進兵趨衡朝選與其四子匿於神祠搜獲

斬之餘孽盡殲臣令懷順王耿仲明固山額真金礪梅勒章京卓羅等由衡州水路還長沙遇僞總兵楊國棟擁賊二千屯天津湖前隊甲喇章京張國柱扎薩藍等擊敗之次日國棟領馬步賊三千從牛皮灘遁去我兵追擊之生擒僞副將七員懷順王耿仲明等至長沙國棟領馬步賊七千水陸迎戰我兵奮擊賊眾大敗追入長沙城內悉殲之又聞賊困桂陽州令智順王尙可喜同藍拜等赴援畱固山額真金礪等於衡州臣同懷順王耿仲明並卓羅等趨祁陽聞賊兵三千據熊飛嶺隨率兵三百趨擊追入祁陽我軍齊集圍其城殺僞總兵一副將一馬步賊七千又聞賊據寶慶畱懷順王耿仲明爲後應臣引兵趨寶慶圍其城克之斬僞魯王朱鼎兆世子朱乾生僞總兵黃晉李茂功吳興僞監司劉佐僞副參遊都守四十餘員馬步賊三萬二千又聞僞永厯據武岡州我

兵夜發疾進令梅勒章京黑成功協領渥赫納等爲前隊遇賊梗路黑成功等擊敗之賊奔入木城次日我兵縱火焚木城奪門而入斬僞監軍道一僞總副參遊等官百七十餘馬步兵萬八千有餘師抵武岡僞永厯僅以身遁劉承蔭降先是智順王尙可喜等趨桂陽時聞郝搖旗所部賊一千四百聚翔鳳鋪令護軍統領線國安協領蘇朗等擊敗之師抵桂陽賊解圍遁藍拜等趨進搖旗逸去又遣國安等引兵趨靖州追緝僞永厯有僞總兵蕭曠姚有姓擁賊一萬土司兵二千據靖州國安等疾趨圍其城奪門而入生擒曠及有姓餘賊悉殲僞侍郎蓋光英等領土司兵萬四千揚言欲奪蕭曠姚有姓侵犯我營擊敗之師趨沅州聞僞伯張憲弼部下僞總兵分列五營於黔陽令藍拜往圍之賊出城迎戰藍拜等擊之斬賊七千餘師至沅州憲弼擁賊三萬有奇出城拒戰我

兵奮擊遂克其城湖南悉平貴州黎平府僞岷王朱埏峻降計前後所獲僞永厯太子朱爾珠驪山王朱埏崐安昌王朱埏睿並僞將軍等宗姓等二十七人招降僞國公劉承蔭僞伯王雲程劉承永董英周思仲高濤浩鄭應昌僞內閣吳秉僞巡撫傅上瑞及僞總兵四十七員僞副參遊等二千餘員馬步兵六萬八千有奇獲馬匹船隻無算苗夷大半俱降其未順者已遣人招撫新服地方需人料理隨令總兵官于時中副將王希用率新降兵二千四百駐衡州府又委副將何允爲總兵官同副將劉尙艾率新降兵一千二百駐武岡州投誠總兵陳躍龍副將蕭遠領新降兵三千駐黎平府偏沅巡撫高斗光有疾未痊委投誠僞伯周思仲代之又令投誠副將張勒領新降兵一千同周思仲駐沅州總兵官馬蛟麟駐常德府優旨嘉獎之○丁亥山東巡撫張儒秀奏賊首丁維

岳張堯中肆毒東究勢成燎原臣飭各屬嚴緝飛報守臣沙爾虎達率兵奮擊殺賊無算丁張二渠授首○己丑定官民服飾之制○庚寅原任浙閩總督張存仁奏副將馬成等援剿處州斬賊無算恢復景甯雲和龍泉三縣○湖廣荊州總兵官鄭四維奏逆賊牛萬才窺伺松滋遊擊劉進忠等援剿斬賊千餘賊奔深谷臣慮荊州屬邑遼闊又接壤襄鄖陝蜀滇有歷來未服土司通同諸賊盤踞歸巴窺伺彝陵誠爲心腹之患請增兵防守彝陵澧州以爲久遠之計章下所司○福建巡撫佟國鼐奏逆賊鄭彩等糾眾數萬圍攻省城副將鄒必科等奮剿斬級數千餘賊潰散○乙未湖川總督羅繡錦奏提督總兵官孫定遼剿賊至鄖屬安陽口營壘未備眾賊掩至定遼戰死下所司知之○丙申輔政德豫親王多鐸同鄭親王濟爾哈朗郡王博洛鎮國公固山額真拜尹圖輔國

公內大臣錫翰鞏阿岱固山額真何洛會固山額真宗室韓岱內
大臣多爾濟等議遣索尼冷僧機大學士范文程剛林祁充格等
啟攝政王曰今國家既定享有昇平皆皇叔王福澤所致其元旦
節皇叔父王於 皇上前行禮及百官行禮起立以待進酒時入
班行跪禮俱行停止我等所以啟請者知皇叔父王體有風疾不
勝跪拜恐勉強行禮形體過勞國政有誤攝政王從其言諭曰止
今年率眾行禮畢就坐位進酒時不入班行跪禮以後凡行禮處
跪拜永行停止復諭禮部曰 皇上前行禮畢初二日郡王以下
及各官免至予處行禮○是歲鹽三百七十七萬四千三十二引
課銀六百七十六萬五千三百六十一兩四錢九分有奇鑄錢十
三萬三千三百三十八萬四千七百九十四文